

長沙府嶽麓誌

長沙府嶽麓誌卷之七

詩

郡丞山陰趙

瀟湘八景圖詩總序

瀟水出道州湘水出全州至永州而合流焉自湖而南皆二水所經至湘陰始與沅之水會又至洞庭與巴江之水合故湖之南皆可以瀟湘名水若湖之北則漢沔蕩蕩不得謂之瀟湘瀟湘之景可得聞乎洞庭南來浩淼沉碧疊嶂層崑綿衍千里際以天宇之虛碧襟以烟霞之吞吐風帆沙鳥出沒往來水竹雲林映帶左右朝昏之氣不同四時

之候不一此則瀟湘之大觀也若夫八景之極致則具列于左各系以序

瀟湘夜雨序

苦竹叢翳鷓鴣哀鳴江雲黯黯江水冥冥翻河倒海若注若傾舞泣珠之淵客悲鼓瑟之湘靈大王長嘯起雄風又逐行雲入夢中想像瑤臺環佩濕令人腸斷楚江東

山市晴嵐序

依山爲郭列肆爲居魚蝦之會菱芡之都來者于于往者徐徐林端縹緲巒表縈紆翠含山色

紅射朝暉舒不盈乎一掬散則滿乎太虛
亂峯空翠晴還濕山市嵐昏近覺遙正值微寒堪
索醉酒旗從此不須招

遠浦歸帆 序

晴嵐漾波落霞照水有葉其丹撻如飛羽幸濟
洪濤將以宜處家人候門觀笑容與

漢江游女石榴裙一道菱歌兩岸聞估客歸帆休
悵望閨中紅粉正思君

烟寺晚鐘 序

瞑入松門陰生蓮宇杖錫之僧將歸林莽蒲牢
一聲猿驚鶴舉幽谷雲藏東山月吐

絕頂高僧未易逢禪床長被白雲封殘鐘已罷寥
天遠杖錫時過紫蓋峯

漁村夕照

序

翼翼其廬瀕崖以居泛泛其艇依荷與蒲有魚
可鱸有酒可需收綸卷網其樂何如西山之暉
在我桑榆

曬網柴門返照新桃花流水認前津買魚沽酒細

江去遠弔懷沙作賦人

洞庭秋月序

君山南來浩浩滄溟飄風之不起層浪之不生
夜氣旣清清露斯零素娥浴水光盪金精倒覓
裳之清影來廣樂之天聲纖雲不起上下虛明
李白曾移月下仙煙波秋醉洞庭船我來更欲騎
黃鶴直向高樓一醉眠

平沙落雁序

霜清木落蘆葦蒼蒼羣鳥肅肅有列其行或飲

或啄或鳴或翔匪上林之不美懼緡繳之是將
雲飛水宿聊以隨陽

陣斷衡陽借此廻沙明水碧岸莓苔相呼正喜無
緡繳又被孤城畫角催

江天暮雪 序

歲晏江空風嚴水結馮夷翦冰亂飄洒雪浩歌
者誰一篷載月獨釣寒潭以其清絕

蓑笠無踪失釣船彤雪黯淡混江天湘妃獨對君
山老鏡裏修眉已皓然

余購得李營丘畫瀟湘八景圖拜石餘閒逐景
撰述主人以當臥遊對客卽如攜眺元豐三年
夏四月襄陽米芾書

遠浦歸帆

元揭傒斯

冥冥何處來小樓江上開長恨風帆色日日誤郎
回

烟寺晚鐘

朝送山僧去暮喚山僧歸相喚復相送山露濕人
衣

漁村夕照

定從海底出且向平沙照魚網未曾收漁翁還下釣

洞庭秋月

灝氣白澄穆碧波還蕩漾應有凌風人吹笛君山上

江天暮雪

孤舟三日住不見有人家紛紛竹籬處却恐是梅花

瀟湘夜雨

泔泔湘江樹荒荒
楚天路穩繫渡頭
船莫教流下去

平沙落雁

天寒關塞遠
水落沙渚濶
已逐夕陽低
還向黃蘆沒

山市晴嵐

近樹參差見
行人取次多
板橋雙路口
此去幾回過

漁村夕照

元陳孚

雨來湘山昏
雨過湘水滿
夕陽一縷紅
醉眠草茵暖
漁舂班石上
腥風吹不斷
野鳬浮更沉
沙燈荻芽短

烟寺晚鐘

山深不見寺
藤陰銷修竹
忽聞疎鐘聲
白雲滿空谷
老僧汲水歸
林雲墮衣綠
鐘殘寺門掩
山鳥自爭宿

山市晴嵐

元文璧

野橋倚市官柳疎旗亭酒香笑客沽雞飛出村犬
吹柵舍南舍北相追呼山人相呼起朝日山色滿
空晴欲滴日高人散市聲稀長林靄靄虛烟白

漁村夕照

元程鉅夫

釣艇收晚緝歸鴉集疎柳天風吹宿伴明滅映江
口

烟寺晚鐘

僧定鐘聲緩依稀聽不眞渡頭風正急喚醒未歸
人

平沙落雁

翩翩數行下灘磧俯蒼波此處稻梁好人間曾幾
多

八景臺

元歐陽元

山幾層兮水幾重晴嵐夕照有歸鴻瀟湘八景丹
青畫盡在高臺指顧中

明宣宗瀟湘八景圖詩

瀟湘夜雨

濃雲如墨黯江樹九疑山迷天色暮蒼松巖下客

維舟魚龍鼓舞飛烟霧但見長空風雨來勢與雲
夢相周廻三湘淋漓瀉銀竹七澤洶湧翻春雷長
江橫絕巴陵北一水悠悠漾空碧洪濤巨漲頃刻
中虹橋隱隱無人跡前溪遙見野人家槿籬茅屋
半欹斜高樓誰得江湖趣坐聽瀟湘對燭花隔浦
鐘聲來遠寺曉色蒼涼喜開霽青天萬里白雲收
滿日湘江翠欲流

洞庭秋月

洞庭秋水清徹底岳陽城頭月初起巴山落影半

湘陰金波倒浸芙蓉零須臾素景當瑤空寒光下
燭馮煖宮雲夢微茫冰鑑裏沅湘浩蕩玉壺中霜
華初飛風浪息萬籟無聲夜方寂彷彿湘靈汗漫
遊虹橋直跨天南北但見鷗汀與鷺洲折葦寒莎
帶淺流縞衣綸巾湘中老高歌取醉岳陽樓回看
月下西山去湖水悠悠自東注洞庭咫尺西南陬
赤岸銀河萬里秋

山市晴嵐

茅屋幾家山下住長橋遙接山前路湖天雨過曉

色開滿市晴嵐帶烟樹遠山近山杳靄間前村後
村相瀾漫浮藍積翠久不散懸崖滴露松稍寒湘
帝老人頭半白琴僕從容隨杖舄林下青帘賣酒
家山穀野藪漁樵客洞庭春來湖水生君山到處
花冥冥波光澄涵橫素練樹色掩映開銀屏撫景
徘徊看未足颯颯天風滿林麓何人獨倚岳陽樓
長笛數聲山水綠

平沙落雁

秋江水落波浪淺平沙渺渺連天遠白蘋黃蓼滿

瀟湘枯葦寒蘆迷漢沔鴻雁恒憐澤國秋數聲忽
報楚天秋萬里避寒遘朔漠幾行帶雪下汀洲雲
水微茫少矍鑠歲歲南來懽有託霜田豈乏稻粱
謀江村自得棲遲樂黃鶴樓前鐵笛鳴時驚嘹唳
兩三聲溯通巴蜀寒烟淨天接荆衡暮景澄嗟爾
迢迢自荒服慕戀中華生計足行當懋德覆羣生
盡使洪纖皆發育

遠浦歸帆

斜陽欲掛晴川樹丹霞遠映瀟湘浦洞庭湖上接

星沙萬里歸舟自何處雲帆縹緲天際來勢壓滔
天雪浪摧須臾已達漢江曲江聲洶湧如鳴雷漢
陽城頭夜吹角暫從鸚鵡洲邊泊長笛一聲山月
低殘燈數點江雲薄西蜀滇南與海通浮波來往
自無窮暮天已捲三湘霧曉日還懸七澤風突兀
危樓瞰江水臨眺何人頻徙倚寒鴉飛盡澹烟收
浩蕩瑤空淨如洗

漁村夕照

岳陽城頭望湘浦芳草垂楊迷古渡晴嵐霏白夕

陽紅渺渺江村天欲暮漁家茅屋在汀洲釣罷歸
來穩繫舟自念生涯在網罟臨風高掛向船頭出
水鮮鱗雜紫蟹鱸頭有酒還堪買東隣西舍當此
時歡笑聲餘歌款乃豚魚吹浪白蓮天隔江賈客
促歸船餘光遠映雙鳬外殘影半落孤鴻邊湖上
高樓雲外起下瞰湖湘千百里憑高一望楚天低
雲樹蒼蒼暮山紫

烟寺晚鐘

烟光漠漠春山紫古寺深藏萬松裏夕陽西墜羣

壑陰隔杯靄靄疎鐘起瀟湘無風波浪停恍如水
底鳴長鯨山僧策杖歸來晚遙聽穿雲百八聲緩
急因風如斷續遠徹山阿並水曲已隨暮角響江
城更送樵歌出林麓乘橋二客心悠然偶立遙看
瀑布泉高山流水有深意咫尺不聞音韻傳乾坤
無塵萬籟靜朗然空谷聲相應高秋正遇晚霜清
分明若向豐山聽

江天暮雪

大江東去天連水薄暮蕭蕭朔風起須臾吹卻凍

雲同六花亂撒滄浪裏橋南橋北樹槎牙隔浦紛
紛集曉鴉馬嘶百折蟠雲路犬吠孤村賣酒家俯
仰山川同一色眼前不辨浪花白茫茫七澤與三
湘分明皓彩遙相射漁翁獨酌寒江濱頃刻瓊瑤
飛滿身得魚醉唱湖南曲欸乃一聲天地春有時
倚棹弄長笛洞庭景物清無敵中流迢遞望君山
但見遙空聳銀壁

瀟湘夜雨

明薛瑄

兩岸叢篁濕一夕波浪生孤燈篷底宿江雨篷背

鳴南來北往客同聽不同情

遠浦歸帆

翩翩投極浦漠漠背殘照水柵歌竹枝清風極幽
調歸舟漸覺稀錯莫尙疑眺

烟寺晚鐘

夕照下山阿清音出烟霧暝壑一僧還側仵尋歸
路月上楚天寬霜落洞庭樹

洞庭秋月

西風淨晚烟天水遠相接瓊樓玉宇深炯炯涵雙

白夜久風露涼一曲湘靈瑟

瀟湘夜雨

明夏原吉

二女南來正斷魂那堪風雨又黃昏
瀟瀟無限思君淚都作江邊竹上痕

瀟湘夜雨

明沈明臣

九疑山色望來空客夢家山夜雨中
無奈鷓鴣啼到曉黃陵廟口落花風

洞庭秋月

木落天青萬里波洞庭秋色月明多
不知何路長

沙去只唱三洲估客歌

漁村夕照

不知誰唱白銅鞮楊柳村通又大堤欵乃一聲風
斷續打魚人背夕陽西

瀟湘夜雨

明李夢陽

夜響起秋竹浩浩楚雲白曉來看沙觜新水添一
尺

洞庭秋月

天水本自空圓月沉秋映晶晶起霜色千里一懸

鏡

漁村夕照

夕陽下洞庭網集清潭上一丈黃金鱗可見不可網

烟寺晚鐘

美人杳何處盈盈隔秋水遙遙雲外鐘日落暮山紫

遠浦歸帆

秋風五兩席點點聚復散不信小小鳥飛飛速征

雁

山市晴嵐

峯晴堆夜嵐晨炊翠猶濕但聞山鳥鳴不見鳥出
入

平沙落雁

西風萬里雁一葉洞庭秋羣浴金沙軟瀟湘霜氣
流

江天暮雪

長江滾浪雪烟黑花爭飛可怪橫流者孤舟一笠

歸

瀟湘夜雨

明顧開雍

秋夜難爲客
千山雨到牀
暗鳴楓落澗
濕徧柳侵塘
帶鶴聲猶舊
支狼淚更長
湘絃何太急
蕭瑟滿他鄉

漁村夕照

撥棹烟波外
收綸弔落暉
蓼花迎棹入
黃葉補衣歸
沃酒漁燈亂
燒鮮野火飛
夢魂無一事
風雨付前磯

烟寺晚鐘

萬壑何年寺黃昏鐘到時天寒沉水遠風定出山
遲逸鹿驚新櫂歸禽託故枝勞勞羣動息向晚始
應知

遠浦歸帆

濁浪迷新浦還舟夜夜看天涯流落易秋暮日歸
難鄉語兒童舊顛毛歲月殘風波吳楚濶無恙到
江干

洞庭秋月

萬頃蒼茫夜高秋月倍明魚龍分浪白鳥鵲渡河
清倒鏡窺湘影懸樓掛岳城古今南北意漁父一
陶情

平沙落雁

候雁將南度嗸嗸下楚湘沙洲秋命侶雲外夜相
望世路多矰弋安棲豈稻梁明朝廻整羽關塞出
翱翔

山市晴嵐

大麓空霄霽山腰半吐嵐曉林清漾白碧嶂界拖

藍捲雪工無杼裁雲手未諳鏡中圖畫出城郭總
優曇

江天暮雪

歲暮江雲接遙空雪正飄花搖山改色寒送柳分
條室戶烘芽敵登樓溫火消酒闌詩句徹還道賦
漁樵

洞庭秋月

明黎擴

湖上清秋雨扁舟泛碧波紫簫吹不斷無奈月明
何

洞庭秋月

明唐寅

洞庭湖上岳陽樓檻外波光接素秋
數點征帆天際落不知誰是五湖舟

瀟湘夜雨

魚龍出没吼江濤墨染雲烟不斷飄
喬日橘洲何處是蒲江蘆荻夜蕭蕭

漁村夕照

鷓鴣啼斷雨初晴渡口風來水氣腥
溪北村南齊曬網釣船閒在夕陽汀

山市晴嵐

一帶晴嵐入畫來
山雲寂靜水光開
千門晝掩和塵隔
莫把長安古道猜

洞庭秋月

明張經

秋宇淨無雲
嬋娥展孤鏡
灝氣浸澄波
蕩漾光還定

漁村夕照

日落大江頭
返照江村裏
獨有羨魚翁
垂綸收不起

瀟湘夜雨

明 吳道行

漏落重門寂碧浸千山影何處空濛聲淅淅敲人醒

洞庭秋月

清光紆素練濯濯篴紋柔朗吟誰是者共醉洞庭秋

山寺晴嵐

湖烟不受日山霽欲延暉遙見鶯啼處營營向翠

微

洞庭秋月

露白金波淨空青玉鏡行君山最縹緲看做片雲生

漁村夕照

晞網落日下繫船楊柳中橘洲芳草色翻入夕陽紅

遠浦歸帆

橫浦一林烟過湖萬里船楚人重情思極目此江天

煙寺晚鐘

度水聲猶濕杏妝
靈麓峰江心自樓閣
不隔莫雲鐘

平沙落雁

寫盡碧天意
翔湘岸花可憐
鴻雪爪亦爲點懷沙

江天暮雪

蘭草寒猶綠
雲峰夕更蒼
絕憐天戲弄
一夜隱清湘

瀟湘夜雨

非無江上雨潭水自清哀爲有湘靈瑟烟宵的的
來

國朝

瀟湘夜雨

張璿

蒼茫雲氣暝湘流叢竹蕭疎鎖暮愁積翠晴隨驚
鳥動空青凝傍亂烟浮蘭皋香濕珠垂夢錦瑟聲
寒玉叫秋最是難聽多病客江湖雖遠意悠悠

洞庭秋月

虛碧平臨湛景中露華微動水晶宮珠明星絡流
金蚌練淨樓船駕玉虹青鏡自流湘女照白雲不
係楚臺空亭臯落葉魚龍臥欲採芙蓉待曉風

平沙落雁

寒洲羣下意何如爲愛江聲傍水居啼盡秋風心
事遠啄殘菰米稻梁餘瑤琴每欲窺雲陣錦字無
由蝕蠹魚極目關河千萬里衡陽應不帶人書

遠浦歸帆

牙樯遙倚蔚藍天帆影參差接麓煙片片雲隨沙
鳥疾迢迢風捲渚華偏岸移芳樹啼猿路魚避洄
流下瀨船應有紅妝樓上望江潭羈客幾人還

漁村夕照

陰綠莎磯繫釣艖江頭江外夕陽斜柴門炊黍烟
光薄曲岸棲烏樹影加烽靜戍樓遲畫角燈青砧
杵帶流霞從今莫問桃源路但聽漁歌傍酒家

烟寺晚鐘

何來清響度高峯知隔滄江第幾重未向孤舟探
石穴若臨漲海聽鯨龍月流金碧餘霞散露下樓
臺積靄封更覺禪關僧定後濤生萬壑上青松

江夫暮雪

瑤華西望晚淩淩蕭瑟江聲凍欲凝鷗鳥棲疑遶

故渚蘆花漁不放青燈三湘組練寒光渴七澤雲
環朔氣崩安得尋梅衡嶽頂素香深處踏層冰

山市晴嵐

環邨曙色弄清暉平楚天空衆鳥飛香上酒帘秣
黍熟腥輕魚簞鱸肥衡門樹密收青靄曲巷花
明映翠微莫道湖南卑濕地時逢好景欲忘歸

瀟湘八景有序

瀟湘八景者潭勝也水經云巴陵郡南麇
湘浦又云湘水至巴丘入于江水色清異

稱瀟湘云古有八景臺海內咸稱之轉相
効擬亦若甲天下然獨稱瀟湘者以二水
合注于潭與洞庭接羅子而下三百里皆
古長沙地江湖吞吐氣象殊絕故八景獨
著沿潭水也前人詩歌傳者不少如近代
李崕峒詩王威寧詞竝膾炙人口而非生
長其地琉璃合眼尙隔一塵予厭此熟題
亦不復作偶於雪夜擁爐小孫從師授威
寧句記憶有闕輒相問訊予亦多忘之因

爲絕句示其意亦如柳州作朱陵以上記
老杜作三峽以上詩但數家珍較爲親切
耳不然無故弄此筆墨近于戲矣仲春日
記

山市晴嵐

墟烟旭彩氣相涵天近响樓最蔚藍海市何須問
樓閣古來清絕在湖南

瀟湘夜雨

鼓殘靈瑟暗江濱帝子仙衣濕似塵不是此天偏

夜雨曉來誰爲染湘筠

烟寺晚鐘

響隨晴雨落隨風雨岸霜鐘聽不同最是夕陽雲
外寺度江聲在白雲中

洞庭秋月

風淨湖雲露淨波楚天連漢復連河岳陽無限烟
霜月不及秋蟾氣象多

遠浦歸帆

湘妃祠下白雲磯極目江空入翠微三十六灣帆

轉盡北風飛送幾船歸

漁村夕照

一村蓑笠護漁梁萬井樓臺背夕陽落日過江相對影不須漁火辨滄浪

平沙落雁

沙嶼清寒少荻蘆雲田濶處近南湖分明雁宕天邊影畫入長沙落照圖

江天暮雪

空江香雪畫難成莫靄瑤光並作明誰道君山須

剗卻夜來群玉爲鋪平

瀟湘夜雨

江有溶

卑濕余鄉舊時生
值陸沉湘妃陵欲塌
賈誼宅常陰澤國
年年漏陽臺夜夜
心朝雲何處去
總向雨中尋

洞庭秋月

深夜忽懷曠空明
影靜生浪翻千頃
白舟歷萬山晴何
止遊壺嶠還疑淨
甲兵遠來歌款乃
絕不似鏡鉦

遠浦歸帆

江帆日日過指點是歸人昨夜燈花剝連朝口信
頻羽飛憂客後風利畏烟津抵岸鄉心慰遙看或
米真

平沙落雁

何地非棲向幽清愛古潭峰廻正願息野宿故能
諳飲啄無投處且羅莫苦耽所驚軍借壘笳吹便
難堪

漁村夕照

比舟高曬網起此夕陽延炊熟蘆花渚歌橫橘柚
大纜傳檣檣警不滅笠蓑烟爛醉漁翁樂微聞喚
渡船

山市晴嵐

麓湘開霽氣人在畫圖間毛髮山身吐躋登我意
頑濃如凝曉黛爽欲滴秋顏白晝青燐遍嵐光不
可刪

烟寺晚鐘

寺已經兵革僧猶守鉢雲寂暄微杵下夢醒隔洲

分逐市爭餘
熱休心在薄
臙城門斜半開
只待暮鐘聞

江天暮雪

風景正蕭澁
山川忽改觀
踏歌偏耐苦
索醉不知寒
一葉波中泛
千村鏡裡看
角前尋遠眺
愼勿遇鮑冠

八景詩集句

瀟湘夜雨

水國春寒陰復晴
夜添山雨作江聲
雲連海氣圖

書澗送盡東風過楚城

山市晴嵐

地濕莎青雨後天更逢晴日柳含烟春風無限滿
湘意水上桃花紅欲然

漁村夕照

汀洲雲樹共茫茫片片紅霞映夕陽一尺鱸魚新
釣得數聲漁笛在滄浪

烟寺晚鐘

夕陽常送釣船歸卻聽鐘聲連翠微月照上方諸

品靜洞門高閣霽餘輝

洞庭秋月

南湖秋淨夜無烟綠滿山原白滿川此外俗塵都
不染月光如水水如天

遠浦歸帆

春來江上幾人還嫩葢濃花滿目斑
橋口橘洲風浪足輕舟已過萬重山

平沙落雁

鴻雁新從北地來起行殘月影徘徊
樓臺晚映青

山郭水碧沙明兩岸蒼

江天暮雪

平沙歷亂捲蓬根
路上行人欲斷魂
日暮長堤更回首
歸雲擁樹失山村

洞庭秋月

何之杰

纖阿散彩五湖秋
蕭瑟君山一點浮
木落千峯初湧月
雲開歸雁獨登樓
蓼風碎壁搖汀渚
桂魄生寒繫客舟
昨夜霜娥幾消怨
武陵溪下不勝愁

平沙落雁

天清暮色滿山椒
日落江臯雁陣遙
嘹唳數聲秋月冷
淒其孤影曉星搖
啣蘆避弋樓南楚
候露來賓響北朝
漠漠平沙寒厯盡
春歸何事返飄飄

遠浦歸帆

湘江極目隱歸航
風引輕帆荇帶長
面面翠微凝落日
遙遙紫氣極扶桑
非關估客天涯遠
不斷行人雲夢傍
多少利名難滿載
春花秋月任蒼茫

江天暮雪

同雲靄雪遍江隈
昏暮飛花漫翦裁
沙際漸成珪

壁相山頭誰刻珮環來太康鶴訝寧三楚黃竹宸
衷動九竇舊日山川何處是來朝立圃賦多才

烟寺晚鐘

釋續燈

烟寺鐘聲起悠悠送夕陽入林歸宿鳥泊岸落帆
檣流響驚塵夢餘音繞石牀須臾山谷靜獨立望
蒼茫

瀟湘夜雨

暮雲低野岸夜雨打山扉譙鼓聲初動漁燈影漸
微楓林愁買客蘭渚泣湘妃坐聽牕蕉久更深擁

衲衣

洞庭秋月

蟾光秋正滿湖氣夜來清風動波千頃霜高雁一
聲扣舷歌窈窕擊汰沂空明忽憶乘槎客迢迢望
玉京

漁村夕照

漁村時出沒落照自沉浮烟隔蘆花裊茅低野岸
浮江添春水闊網帶夕陽收誰識風波險垂楊日
繫舟

山市晴嵐

山市千家隱嵐烟一帶橫簾開春乍曉幔捲雨初晴似隔仙凡界猶聞鷄犬聲桃源如可到彷彿觀秦氓

遠浦歸帆

天外孤霞落征帆遠浦歸人看鄉樹杳心逐片雲飛夢去湖山濶傳來音信稀短檣衝岸草猶帶夕陽暉

平沙落雁

北去關山遠南來秋草長宿殘潭渚月叫破楚天
霜有意妨霜繳無心計稻糧安閒鋪錦字疎密自
成行

江天暮雪

雪依江岸積寒逐暮雪流暝色迷芳渚孤烟散遠
洲征帆和凍捲野釣帶冰收誰念繩樞子艱難擁
敝裘

瀟湘夜雨

浙瀝打篷牕春潮一何亟新水長船頭可省離移

九

麓山寺碑記

唐李邕

夫天地之道也東仁而首西義而成故清泰所居
指於成事者已地之德也川浮而動麓鎮而安故
耆闇所臨取于安定者已茲寺大抵厥旨立同是
以回向度門纏于郭右仰止淨域列乎岩巖寶堂
茂業于太虛道樹森稍于層渚無風而林壑肅穆
不月而相事澄明化域未真梵天猶俗名稱殆絕
地位嘗高者不其盛歟麓山寺者晉大始四年之

所立也有若法崇禪師者振錫江左除結澗陰嘗
與炎漢太宗長沙清廟棟宇接近雲霧晦冥赤豹
文狸女蘿薜帶山祇見於法眼寶后依于佛光至
請舊居特爲新寺禪師洎翌日弘聚謀介衆表之
明詔行矣水臬有制丘墟盡平大康二載有若法
導禪師莫知何許人也默受智印深入澄源不壞
外緣而見心本無作真性而注福河大起前功重
啟靈應神僧銀色化身丈餘指定全模標建方面
法物增備壇供益崇廣以凌雲之臺疏以布金之

地有若法愍禪師者江夏人也空慧雙銓寂用同
響慈目相視淨心相續綜覈萬法安任一歸註大
道經究上乘理永託茲嶺克終厥生逮宋元徽中
尚書令湘州刺史王公諱僧虔右軍之孫也信尚
敬田作爲塔廟追存實相加名寶山矧乎弓冶筆
精陶甄意匠畱書藏石緘妙俟時候法宇之傾低
期珍價以興葺遠慮將久遺事未彰梁天監三年
刺史夏侯公諱詳了義重立別構正殿紹太二年
刺史王公諱琳律法師賢或在家出家或聞見眼

見建涅槃像開甘露門長沙內史蕭沅振起法鼓
弘演梵言繼捷捷于景鍾納貝葉于層閣陳司空
吳明徹隋侍中鎮南晉安王樂陽王竝佛性森然
國禎秀著壯廼廊以雲構蔚懸居以天覆開皇九
年天旨大禪師守護法身清澄悲海嚴幢標聳智
火融明襲如來堂坐法華定四行樂而不取三賢
登而更延有若曇捷法師者伐林及樹染法與衣
不墜一滴之油有沾六根之雨總管大將軍齊郡
公權公諱武福德莊嚴喜慧方便疏寫四部鎮重

百城有若智謙法師者願廣于天心細于氣誦習
山頂創立花臺有若摩訶衍禪師者五方圓常四
無清淨以因因而入果果以城城而會如如有若
首楞法師者文史早通道釋後得遠涉吳會幽尋
天臺法界圖于剡中真訣論于湘上具究竟戒數
解說筵一法開無量之門一音警無邊之衆方等
有以復悔雙林有以追遠並建場所互爲住持維
惠鏡禪師者迹其武憑其高超乎雲門絕彼塵網
深以爲性有習道有因止於心返於照習也者坐

乎樹居乎山因也者顧習而無因則不住因而無
習則不證是浮漚和正覺阿若冥搜想息而精進
中堅受除而煩惱殼散百川到海同味于鹹千葉
在蓮比色于淨起定不離于平等發惠但及于慈
悲故能聞者順其風觀者探其道牧伯萃止皇華
游臻啟焚香之上緣託成佛之嘉願上座惠泉寺
主惠亶都維那興哲等皆靜慮演成妙輪轉次因
差別而非法隨品類而得根去二見而入流率一
心而辨事咸以形勝之會如彼修行之迹如此而

封碑未勒盛業不書安可默而已哉將何以發揮
頌聲披揚宿志者也司馬西河竇公名彥澄碩德
高閨紹賢遠識器守嶽厚檢操冰清屬以師長閔
官攝行隨手以家而刑于孝友以已而廣於詩書
以重而雅俗自興以明而至道丕若且猶歸心淨
土護範佛乘摧憍慢之外幢興開示之眞語爰謀
羣吏乃命下僚顧蚊山之易疲嘆龍宮之難紀
其詞曰

天地有象聖賢建極晏坐中崖成道西域後代

襲武前良作則安樂是依靈鷲是式一想冥契

三歸願塞 其一

金方置廟衡嶽開場擁錫龍象人天護香鬼神
賜土靈化度堂重鎮牧伯上遊侯王光照法侶

大啟神房 其二

幽谷左豁崇山右峙瞰郭萬家帶江千里玉水
布飛石林云起雷激庭際月窺窗裡花臺隨足

天樂盈耳 其三

人與地靈心將法滅既往在此比明齊哲佛日

環照牛車結轍連率順風駟驥欽慕訪道追勝
形馳日絕 其四

碑板莫建軌物未弘和合是請佐貳是膺政縣
大郡信發廣乘願言有述以訪無能惟石可久
與山不崩 其五

建岳麓書院記

陳 艮

自唐季至於五代用兵而教事闕聖人作四方
第平以俎豆勝干戈而天下靡然日趨于文蓋宋
受命四年遂平荆湖又十有一年尚書朱洞來守
長沙作書於岳麓山下在國史其行事不甚較著
足以考見上意所鄉爲吏者皆承休德知所先後
如此豈不盛哉而其風動抑何速也五六十載之
間教化大治學者皆振振雅馴行誼修好庶幾于
古當是時州縣猶未立學所謂丁九教授未有顯

者而四書院之名獨聞天下上方崇長褒異之者
甚至則其成就之效博矣熙寧初行三舍之法頗
欲進士盡由學校而鄉舉益重教官之選舉子家
狀必自言嘗受業某州教授使不得人自爲說崇
寧以後舍法加密雖里閭句讀童子之師不闕自
州學者皆有禁詔令誠甚美然由是文且勝而利
祿之念多老師俗儒盡向之書院不知起何時以
予所聞漢初郡國往往有夫子廟而無教官且不
置博士弟子員其學士嘗訓試供養與否闕不見

傳記然諸儒以明經教于鄉率從之者數千百
輒以名其家齊魯燕趙之間詩書禮易春秋講論
家各甚盛則昔書院近之矣縣官時時遣守相勞
問致饋爲禮其間生皆世守師說更相傳受不易
業蓋至武帝時郡國始稍稍有學校官田觀漢晚
出視其初儒者術業工拙優劣可知也已方大中
祥符間天子使使召見山長周氏式拜國子主簿
詔晉講諸王官式固謝不應詔卒還山肄業習如
初至賜對衣鞍馬內府書而宋有戚氏吳有胡氏

魯有孫氏石氏各以道德爲人師不苟合於世著名予以是益歎國初士風之厚本之師道尊而書院爲不可廢乾道元年故帥樞密劉公珙克復開寶之舊已浸廢墜今直徽猷閣潘公疇亟踐修之某得官桂陽于長沙爲屬邑始詣大府請事時公至鎮適數月矣與凡郡守要束咸以寬簡闔部晏然民吏意得曾無凡目可以再三干有司者因得陪別駕後至書院謁諸先生祠下適會修事且輯諸生穆然而志專徘徊樂之不忍去也旣去州教

授兼山長顧杞堂長吳獵以訖役屬爲之記某嘗
獲誦侍講張先生所爲記及于治心修身之要湖
湘之後亦既知所指歸近歲以其論述由太學禮
部奏名及對大庭連爲天下第一他未試可畧睹
矣雖欲有言無以出講聞之外者而公于今卿大
夫爲先進年益高聞望益尊重人人能道之又何
待余言者故但次書院所從廢興之故爰係以歲月
而強付名焉是歲淳熙十有五年

嶽麓書院記

宋張栻

湘西故有藏室背陵而面壑木茂而泉潔爲士子肄業之地始開寶中郡守朱洞首度基創置以待四方學者歷四十有一載居益加葺生益加多李允則來爲州請於朝乞以書藏方是時山長周式以行義著祥符八年召見便殿拜國子學主簿使歸教授詔以嶽麓書院名增賜中秘書於是書院之稱始聞天下鼓箐登堂者相繼不絕自紹興辛亥更兵車灰燼什一僅存間有留意則不過襲陋

仍弊而又重以撤廢勸爲荒榛過者嘆息乾道改
元建安劉侯下車旣剔蠹夷姦民俗安靜則葺學
校訪儒雅思有以振起湘人士合辭以書院請侯
竦然曰是故章聖皇帝加惠一方本勸勵長養以
風天下者亦可廢乎乃命郡教授婺源郭頴董其
事鳩廢材用餘力未卒歲而屋成爲屋五十楹大
抵悉還舊規肖闕里先聖像於殿中列繪七十子
而加藏書於堂之北旣成枻促多士往觀焉爲愛
其山川之勝棟宇之安排徊不忍去以爲會友講

習誠莫此地宜也已而與多士言曰侯之爲是舉也豈特使子羣居佚談但爲決科利祿計乎亦豈使子習爲言語文辭之工而已乎蓋欲成就人才以傳道而濟斯民也惟民之生厥有常性而不能以自達故有賴聖賢者出三代導人教學爲本人倫明小民親而王道成夫子在當時雖不得施用而兼愛萬世實開無窮之傳果何與曰仁也仁人心也率性立命位天地而宰萬物者也今夫目視而耳聽手持而足行以至於飲食起居言動之際

謂道而有外夫是烏可乎雖然天理人欲同行異情毫釐之差霄壤之謬此所以求仁之難必貴於學以明之與善乎孟氏之發仁深切也齊宣王見一牛之顛觶而不忍則教之曰是心足以王矣古之人所以大過人者善推其所爲而已矣論堯舜之道本於孝弟則欲其體夫徐行疾行之間指乍見孺子匍匐將入井之時則曰惻隱之心仁之端也於此焉求之則不差矣嘗試察吾事親從兄應物處事是端也其或發見亦知其所以然乎苟能

默識而存之擴充而達之生生之妙油然而中則
仁之大體豈不可得乎及其至也與天地合德鬼
神同用悠久無窮而其初則不遠也是乃聖賢所
傳之要從事於茲終身而後已可也雖若閒居屏
處庸何損於我得時行道事業滿天下而亦何加
於我豈特爲不負侯作新斯字之意哉旣侯屬棧
爲記遂書斯言以厲同志俾毋忘侯之德抑又以
自勵云爾

建嶽麓書院記

吳澄

天下四大書院二在北二在南在北者嵩陽睢陽也在南者岳麓白鹿洞也其初聚徒受業不仰給于公養然嵩陽睢陽白鹿洞皆民間所爲惟嶽麓乃宋開寶之季潭守朱洞所建其議倡自彭城劉整而潭守成之也時則陸川主簿孫邁爲之記紹興燬于兵乾道之初郡守建安劉琪重建時則有廣漢張子敬夫爲之記德佑再燬于兵大元至元二十三年學正郡人劉必大重建時則奉訓大夫朱

渤爲之記逮延佑甲寅垂三十年矣壞陵劉安仁
來爲郡別駕董儒學事覩其樊圯慨然整治木之
朽者易壁之漫者圻上瓦下甕更撤而新前禮殿
旁四齋左諸賢祠右百泉軒後講堂堂之後閣曰
尊經閣之後亭曰極高明悉如其舊門廡庖館宮
牆四周靡不修完善化主簿潘必大敦其役朱某
張厚相繼爲長其始末請紀歲月余謂書院之肇
創重興與夫今之增飾前後有四劉氏道同志合
豈苟然者哉開寶之肇創也蓋惟五代亂離之餘

學政不修而湖南遐遠之郡儒風未振故俾學者
于是焉而讀書乾道之重興也蓋惟州縣庠序之
教沈迷俗學而科舉利誘之習鼓惑士心故俾學
者于是焉而講道是其所願望于來學之人雖淺
深之不侔然皆不爲無意也考于二記可見嗚呼
孟子以來聖學無傳曠千數百年之久衡嶽之靈
鍾爲異人而有周子生于湖廣之道州亞周孔孟
顏而接曾子子思孟子不傳之緒其源遂開其流
遂衍又百餘年而有廣漢張子家于潭新安朱子

官于潭當張子無恙時朱子自閩來潭留止兩月
相與講論闡明千古之秘驟遊嶽麓同躋岳頂而
後去自此之後嶽麓之爲書院非前之嶽麓矣地
以人而重也然則至元之復建也豈不以先正經
始之功不可以廢而莫之續也乎別駕君之拳拳
加意者亦豈徒掠美名爲是哉其所願望于諸生
蓋甚遠也且張子之記嘗言當時郡侯所願望矣
欲成就人才以傳道濟民也而其要曰仁嗚呼仁
之道本先聖之所罕言輕言之則學者或以自高

自廣而卒無得論語一書大示學者求仁之方而
未嘗直指仁之全體蓋仁體之大如天之無窮而
其用之行于事物無不在通之事親事長微而一
言一動皆是也飲食居處一不謹焉非仁也步趨
唯諾一不謹焉非仁也溫清定省一不謹焉非仁
也凡此至近小甚易不難而明敏俊偉之士往往
忽以爲不足爲仁不可幾矣嗚呼仁人心也失此
則無以爲人曾是熟於記誦工于辭章優于進取
而足以爲人乎學于書院者其尙審問于人慎思

乎已明辨而篤行之哉

百泉軒記

元吳澄

昔孟子之言道也曰若泉始達曰源泉混混泉乎
泉乎何取于泉也泉者水之初出也易八卦之中
坎爲水六十四卦之中有坎者十五水之在天爲
雲爲雨而在地則爲泉故坎十五卦象水者十一
象雲者二象雨者一獨下坎上艮之蒙水出山下
其象爲泉而以擬果行育德之君子嶽麓之泉山
下之泉也嶽麓書院在潭城之南湘水之西衡山
之北固爲山水絕佳之處書院之右有泉不一如

雪如汞如練如鶴自西而來趨而北折而東還遶而南渚爲清池四時澄澄無髮滓萬古涓涓無須臾息屋於其間名百泉軒又爲書院絕佳之境朱子元晦張子敬夫聚處同遊嶽麓也晝而燕坐夜而棲宿必於是也二先生之酷愛是泉也蓋非止于玩物適情而已逝者如斯夫不舍晝夜惟知道者能言之嗚呼豈凡儒俗士之所得聞哉中經兵火軒與書院俱燬至元丁亥始復舊觀上距乾道丁亥二先生遊處之時百二十一年矣延佑甲寅

潭郡治中壘陵劉侯又重修之侯與余相好也余亦知侯之爲人故其修是軒也余爲之記侯名安仁字德夫余爲誰臨川吳澄

建嶽麓書院記

明李東陽

東陽昔省墓長沙嘗渡湘江登嶽麓訪宋人所謂書院者得斷碑遺址于榛莽間慨晦翁南軒二先生之餘風遺澤未有以復也顧有寺存焉耳越二十餘年則聞通判陳君捐俸治材爲中門爲左右廡甃石數級上爲講堂又上爲崇道祠以祀二先姓名之曰嶽麓書院未幾陳君以內艱去且卒通判李君錫與推官彭君琢構亭其巔名之曰極高明又買田若干畝以成陳志比王君來知府事帥

僚屬師生行釋菜禮諸所未及如闢道路備器用
廣旁舍儲置經文延師領教皆次第舉行而同知
楊君實佐其事蓋茲院自宋初郡守朱洞始建真
宗時李允則請藏書國子監簿周式教授其間乃
請賜額遂與應天白鹿石鼓並稱爲四大書院及
南渡燬于兵安撫劉公珙復建孝宗時二先生實
會講焉光宗時晦翁爲安撫更建于茲地學者多
至千人田至五十頃廟舍至百餘間今殿基故在
遺址廢田爲僧卒勢家所據厯三百餘年而茲院

如復其舊于是王君遣使屬記於予亦陳君昔所嘗
請也余惟古者學校遍天下其教興學者皆聖賢
之道故能以一德同俗及世衰政弛道晦不明上
擇官以教下擇師以學窮什一之力而綏德世之
少治而多亂奚惑哉今學有恒制師有定員第玩
常惴久不能無望乎什一之外如書院者故士或
起于鄉塾則于此爲培養之地或籍于學則藉遊
息以廣見聞使斯道之在天下體用一源顯微無
間者隨厥窟達皆可爲成已成物之用仍可以言

學不然雖學于此猶學于彼無益也且南軒得衡山胡氏言仁之旨觀所爲書院亦惓惓以是爲辭晦翁之學固有大于彼然亦資而有之後之學者曾不逮其萬一而不百倍其功惡可哉由南軒以全晦翁之學等而上之以希所謂古之人者庶幾爲茲院之重以爲山川光若其成格條緒則存乎教與學吾于吾鄉矣士望之矣院建工于元治甲寅七月落成于丙辰十月陳君諱綱起鄉貢士圭君名瑄楊君名茂元舉進士皆四明人吾郡之賢

大夫也助建祠屋者布政叅議羅君鑒都閩楊君
銓府學生陳大川輩助置田者國子生李經皆郡
人寺僧法印實董其役蓋亦有慕乎吾教者不欲
泯其名亦附書之

嶽麓書院祠祀記

明黃衷

長沙古潭州也興教之地是爲嶽麓書院宋建于
開寶則有朱子洞厯歲而毀建于乾道則有劉安
撫琪厯歲而毀更建于紹熙則有朱先生元晦厯
歲而毀我敬皇帝弘治甲寅陳郡倅綱始復舊
緒嗣而葺者則有楊郡貳茂元率亦陳諸未備者
耳考書院之興廢此其大都焉方其盛時藏書則
有李守允則主教則有周山長式講學則晦翁南
軒二先生歆風嚮道學者計千人授餐田五十頃

絃誦響絕而遊宴踵至君子慨之考教理之盛衰
此其大都焉院舊有祠以祀晦翁南軒潭人請以
山長式郡倅鋼配若或寢之而專祀朱張潭人之
言文公集諸儒之成以明聖賢之道講學于茲吾
師焉安撫于茲吾師焉南軒鳴世大儒并時同業
夫所謂過化者存焉吾祀之山長行誼鄉先生也
鄉先生沒而祀于社山長有焉吾祀之始書院之
鞠于榛莽也閱三百年倅斯來也異夢兆其感遺
碣徵其處費也吾無與焉力也吾無庸焉治吾惠

而教亦吾惠也吾祀之是烏知專之者未爲失而
寢之者固未爲得耶潭人有辭矣君子以爲義民
動以義莫可拂已督學許僉憲宗魯則因舊祠以
祀朱張崇道也更堂焉以祀守洞守允則安撫瑛
山長式郡倅銅序位以世崇教也于是潭人始慰
考祠祀之沿革此其大都焉鉄橋子曰是役也有
足勤者三爾大道旣隱師友義衰口耳之常談無
謂乎教仕進之筌蹄無謂乎學聖賢成已成物之
用無復異時麗澤之餘朱張不遠千里講道湘西

論中庸之義嘗越三晝夜而不合然卒定于朱夫子夫以粹精如文公超悟如南軒猶不能無藉乎問辨劇難之益吾得以勸士良吏之品惟治與教故魯稱絃歌鄭美鄉校蜀郡之餘化贊皇之啟封非教莫取也後世乃有殫力簿書俛首繩檢自委于俗且冗者猶將不免郡倅陳公卒能于文法實密之日無守之力而舉師帥之職若可與古良牧齒者一興教已乎吾得以勸吏民志旣僞俗滋敝矣視去守令如陲涕然潭人懷惠故倅恫若一日

申之祀事以上及乎世之賢大夫者吾得以勸俗
是故士成乎學吏成乎義嗜獨潭之利也乎哉

惜陰書院記

明李 棠郡人

郡志舊有惜陰書院後爲陶公祠陶公封長沙郡公都督荆湘等州有大功於民祀之宜也史稱公朝夕運籌語人曰大禹聖人猶惜寸陰吾人當惜分陰惜陰之名以此嘉靖甲子夏月今節推震川翟公以名進士來茲理學淵源儒飭吏治爲督學憲使吳公重檄三學諸生請講學於嶽麓顧隔於大江之西每以風濤阻於往來乃於郡城外尋城南書院遺址不可得幸陶公祠僅存背陰面陽麓山

相望近府而便諸生從遊欣然鳩工拓而新之復
爲惜陰書院而郡守巴蜀蔣公適至貞純明肅政
學兼優志同道合共謀協舉期年落成爲舍五十
間前爲明道堂中仍祀陶公後構聚英樓藏書閣
門廡池亭翼然輪奐立會長置學田羣諸生於中
二公時臨訓迪之屬棠爲記昔晦翁南軒講學於
嶽麓城南兩書院間士子振振向往以千數時稱
潭州爲鄒魯教化大行四方則之人才輩出出者爲
名臣處者表式鄉閭士至今尙節義而重名檢道

有以風之也而南軒爲記甚詳指示人心擴充之
端所以爲學之方昭然具備在諸生繹其說而求
之耳茲吾郡二公之爲是舉也亦非特使諸生羣
居侈談剽竊章句便遊觀爲燕安之地而已誠欲
成就人才明乎聖賢大學之道以求晦翁南軒之
所以教學者之所以學繼承往哲鄉魯之懿範所
以一道德而同風俗蓋藉是以風動之盛心也不
然庠序學校之設徧天下士遊於庠序學校獨非
可學與說者謂士訪攻於科舉文字之業以應上

之求於是從事於學校之教不暇及於書院之講以
彼視此判然兩事夫孰知聖賢大學之道豈出於
科舉文字之外學校之教非書院之所講歟書院
之所講而學之者又何妨於科舉文字之業科舉
文字固皆孔孟之傳也六經聖人載道之典也非
朱張之所講論而訂註之者乎士惟誦其言無體
驗擴充之力而不知所以爲學之方專攻於科舉
文字之業而無博文約禮深造自得之實一獲進
取遂盡棄之視昔所攻又了不相涉矣是雖惜陰

汗漫馳逐之耳况未之惜乎無惑乎人才之難此
學之不可不講也學必講而後明旣明矣然後知
大禹惜陰之所以聖必有事焉陶公惜陰之所以
忠不徒朝夕百歲之運所以地平天成者在是所
以誼扶社稷者在是皆惜陰之學爲之本也夫子
魯論首曰學而時習之又曰學如不及猶恐失之
孟子曰操則存舍則亡又曰苟得其養無物不長
苟失其養無物不消知乎此則知惜陰之義矣蓋
嘗誦時習恐失之訓而察識於存養消長之際

觀乎天人之微玩易辭而有得焉人心之本體其
象乾乎乾純陽之卦也天之道也渾然全體大通
而至正一有陰而雜乎其間匪純矣匪純邪也邪
暗塞矣故周公繫乾之三爻曰君子終日乾乾夕
惕若乾自初而三陽道長矣朝乾夕惕是時習而
存養之也否則消之爲陰矣夫子之大象亦曰天
行健君子以自強不息不息則可以同天矣天不
息道亦不息則學亦不息其所以惜陰者其至矣
乎學者思禹之聖有感於陶公忠靖之功亦必由

惜陰而進之審長消之機致擴充之力知所以爲
學之方以復其虛靈不昧之體日日新焉聖賢大
學之道不遠於科舉文字之習而得之以是羣於
斯樂於斯相觀而切劘優入乎高明廣大之域無
負乎惜陰矣夫然中有主則守之固知至而行之
利養深而應不窮言之爲德言之爲德行異說
不足以亂之勢利不足以奪之有得於己無待於
外外之所遇不足以動其中曉然分晰於善惡義
利之辨必爲君子而不爲小人得志與民由之不

得志獨行其道此之謂大丈夫顧不偉歟是二公
所以建立書院之意也棠以是記之

朱張祠記

明曾如春

聖朝崇儒神化釀治寰宇雍雍二百餘禩歷憲臣
代狩崇望山川秉宣德意頃直指紫亭甘公南巡
於嶽釋菜嶽麓書院謁晦菴南軒二先生祠特檄
祠制議新規度宜弘垣墉宜固計業役兩月報竣
蔭大觀永棲靈密予藉陪成事落之日敬稽首颺言
曰茲邦人士抑知服習二先生遺訓仰承直指公
新祠作人之盛美矣乎史載乾道間晦菴如湖南
曰南軒講論之語無所考見獨曰嶽麓唱和諸什

一日超然會太極眼底無全牛一日始知太極蘊
要妙難名論是二先生造臻肯綮指授南邦士蓋
太極圖旨也圖始道州元公閎深奧衍歸於主靜
立極而學聖要領訣之乎無欲一言無欲故靜靜
故虛而能神是以與天地合德與日月合明與四
時合序與鬼神合吉凶自太極有圖圖有說有解
此是彼非幾於聚訟惟上天之載無聲無臭數語
最爲完密然中庸所謂無聲無臭實自戒謹不覩
恐懼不聞中來本體不落聲臭工夫不落聞見辨

在有欲無欲之間欲根絲忽不盡便不是戒謹恐懼雖使棲心虛寂終是未離聲臭也欲根銷盡便是戒懼真體雖終日酬酢營爲莫非神明妙用而未嘗涉聲臭也此之謂無所爲而爲之義萬物一體之仁昔者伊尹道協一德功格于皇天世嘗誦其勛烈冠古今而不知其不視不顧者則根荳固也嗟呼此非無欲令甲而元公所望斯人以志之者與邦人士幸生元公之鄉服行二先生過化之道矧遊息有地館穀有資作養有人試驗之不爲

不欲之素視阿衡何如也斯可以仰對直指公已
公諱士价江西信豐人萬厯丁丑進士淵源正學
敦隆先儒一廵南國而濂溪嶽麓嘉惠表章百年
茂舉是役也時絀而用不告匱事集而力不告疲
費省而工則稱鉅時知府吳道行濱川人雅尙好
文協謀肇美董其役者湘陰縣丞山陰俞堯中

康熙戊申重建嶽麓書院記 周召南

今上戊申予以填撫之暇與耆舊諸君子修明掌故刻長沙郡志成因而稽古今風教之盛衰則巍科大節在南宋爲尤著攷其時爲連帥郡守者多名臣大儒相與崇正學之功居多所稱師帥守牧其人則楊文靖真西山朱考亭諸先生也所稱倡道講學其人則胡文定父子呂東萊張南軒諸先生也若夫講學肄業之地則環州邑爲書院者十數處而嶽麓爲最大朱張之講席爲最專前後安

撫刺郡四劉公所創建爲最備當在咸平祥符之間海內四大書院獨嶽麓奉詔賜額頒經籍敦聘山長立三舍法則思數爲最異雖百世可也歷元與明四百年間教不逮古地亦代有興廢廢之旣久無如今日予過其墟不能不愾然以思也旣奉今上詔建義學亟爲卜郡庠左師書院制選佳士而鼓昕之蒸蒸起矣諸耆舊子弟復抱嶽麓圖志以請願得襄事還舊觀若山川文獻之靈勃焉相貺者爰集藩臬守令師儒而謀之僉曰建哉舉端

謹者董其事得雲陽諸生劉溫良長沙義耆魏朝榮任之卽以春夏之交滌其灌莽搜其殘碣疏其流泉鳩工庀材役者千指日給直作食如理家事屬郡倅某時一閱視耳江以東吏民若不知有將作也踰歲六月而工竣按圖以報院之左阜隆起別爲禮殿陞戟廊廡如郡縣孔子廟獨循舊制肖杏壇像四子侍焉別增名宦鄉賢祀有事於嶽麓者爲不同院以內爲堂者二曰成德曰靜一皆講堂而成德則陳鐘鼓敷臯比之地也爲祠堂者二

曰崇道曰君子報功也爲臺者一曰道鄉懷古遷客也爲亭者二曰擬蘭曰及泉臨曲水幕列井也合而綜之以垣凡二里許昔人動稱數年十數年次第而就者今皆巍然翼然丹雘燦然一旦復其壯觀而堅渾雅麗數倍於前謂非天人交助之力不可予因是而竊有感焉唐虞立德三代立政而教行于德政之間孔子兼之以學爲宗故子思直指修道謂教而其要言曰修道以仁夫仁亦二氏之所竊據也然二氏必不可以治天下者無其道

焉耳宋儒懲唐之弊而濂溪挺生於楚文不在茲
乎迨淳熙乾道時諸大儒迭爲此邦之師帥牧守
以理學爲吏治南軒先生適以其學侍魏公於幕
府密贊忠勤考亭夫子嗣且以安撫帥潭政教大
行比於鄉魯海內學者咸以嶽麓爲歸則兩公之
能用其仁益明矣然而浮屠老子之宮當時非不
並盛諸名臣大儒但力舉其政教以匡翊忠孝廉
節之原未嘗喋喋焉與之相排擊也亦恃吾道有
以包舉之爾今五百年昌期再振當必有紹明絕

學者來主之予願有志之士敬業於此以求道與
仁之實際而大用於天下勿徒滋朱陸之辯而成
洛蜀之競也斯社稷賴之矣諸士謂落成當有記
敢以鄙意質於大君子云是役也爲棟宇若干楹
計費三千餘緡方與督學使議將以餽士之廩筦
鑰之司山長堂長之名彷彿宋制請於
朝而諸生先礪石求記歲月並勒藩臬郡縣及郡
人士同志而襄事者於其端

重建嶽麓寺藏書閣記

周召南

自其淵深不測者觀之曰性自其虛靈不昧者觀之曰心窮心性之變化極淵深之分量天地於此托基焉聖人於此立極焉萬物於此寄命焉儒者謂之至誠釋者謂之圓覺誠而曰至天人一理覺而曰圓萬物一體心而已矣性而已矣釋者曰達摩西來直指人心見性成佛初不假語言文字也是語言文字既不足以致此抑果有以妨此也邪學者於四十九年之後迭相傳變集之曰經曰傳

曰錄是古人之前言往行卽今日磨頑礪鈍之具也倘言如古人之言而行如古人之行則言前言往皆妄也倘言如古人而言則言亦妄也行如古人而行則行亦妄也卽鈍去頑釋則言磨言礪亦妄而言頑言鈍亦妄也如以面投鏡則貌雖整而光已掩不如釋貌以空鏡則貌雖泯而光已圓所以德山入門便棒臨濟入門便喝是琉璃殿上也

未可坐在光影池邊也豈惟二師如來於殊再請說法世尊咄曰吾四十九年豈

說法耶惟拈青蓮華於大衆會中迦葉破顏一笑
是其爬着癢處耳嗚呼噫難言之矣今試將拈花
一着指出曰教外別傳又如何爲人天百萬布置
也哉夫日月有明容光必照見容光者知日月之
所在洞日月者徹容光之所及人非聖人得曰不
學是語言文字雖不足以致此又豈足以妨此也
哉學者不得不於一端引全體不得不於一曲博
大化者也則一大藏教如日月之在中天誰不承
恩觀明星而開眼望野鷺而酸鼻又烏在非語言

文字也哉星沙郡城西有古嶽麓寺爲虎岑禪師所闢盛地也向以兵火頽朽無一片瓦有禪師肺山檀者衍青原石頭繼藥山起湛然腳下接曹溪正派毅然獨立結草廬而居七年如一日郡人士惻焉又五年而大殿法堂諸聖像悉具人皆動之師以真誠要終始遂得復祖塲如故謂虎岑至今日再來可也余甲辰之秋奉命撫駐星沙未至夢師以偏袒會於沅芷署中至日往觀宛然得師于夢中者言下契合一時計藏經閣不就復一年經

備閭成索余記余何足以記哉竊願與藏經閣相
忘於無言之表而與師亦相忘于無言之表而已
矣爲之偈曰

本無法也何以有經既有經也何以不銘人天百
萬願藉此醒天上三辰誰觀明星王宮出降今古
其刑堯率未離十方萬靈住持圓覺未嘗曰形甚
深微妙誰復曰扁普同供養日照曰臨大千世界
曰清曰崑明珠在庭曰精曰瑩

重建嶽麓書院碑記

丁思孔

嘗觀古君子之出而服官也將以宣達政教以
安士庶則必竭其力之所得爲以務其職之所
當盡而時地之說固有所不計焉夫時有緩急
則宜羸舉絀無絀舉羸是也地有難易則先其
重者大者後其輕者小者是也然亦言其大槩
云爾若其修舉廢墜之心則有皇皇然無敢以
宴安者今

皇上勵精求治宵旰不遑凡所嘉惠元元者罔不利

興害剔纖鉅畢洽而必以興起教化移易風俗
爲首務薄海內外亦旣文德覃敷聲名暨訖矣
頃者滇逆犯順負嵎於衡湘洞庭間肆其蹂躪
聖天子奮揚威武不旋踵而底定而涖治茲土者敢
遽以禮義之教望之靡敝困頓之民俗哉歲在
甲子余恭承

簡命來撫湖南經其野田尙汙萊入其城市猶墟落
欲一旦起瘡痍而登諸衽席殆憂憂乎難之况
於廣教化而美風俗又豈易爲圖者然余深念

士爲四民之首如隆古以鄉三物而攷其德行
道藝今雖不可以驟幾要其可從事於學者當
自文義始爰是告戒九屬令府州縣有司博士
各課其士而彙其文以上至長善二邑則親臨
府學集而試之初覩其容色顚顚或且纓絕肘
見有觸目愴然者旣而閱其文猶可觀始歎士
之失學未有以教之也而教之不行又無以養
之之過也攷楚志長沙舊有嶽麓書院爲宋張
南軒朱晦菴兩大儒講學地於時遠近嚮慕絃

誦之盛比於鄒魯前明正德崇禎時屢爲修葺
兵燹後久就圯殿廡祠堂鞠爲茂草矣余乃上
體

聖天子典學師古之意謀所以復之則與藩臬道府
諸長吏約節其祿食慮事鳩工因其舊址經始
於乙丑秋仲而聖殿兩廡齋舍成招致生徒肄
業其中設贍餼廩每月課試者三手自丹黃甲
乙之爲多士勸越丙寅而高明中庸諸亭又成
藏修有所遊息有寄負笈來學者日益衆余又

恐其養之不繼也捐俸購田三百餘畝以資膏
火擇諸生老成者掌之然不重以

朝廷之明命虞其久而或替也乃具疏章凡再上仰
荷

俞旨丁卯春

皇上親灑宸翰爲學達性天扁額并十三經二十一
史經書講義遣送到山固以重道崇儒昭我
國家右文之治而興起教化移風易俗之意實於
此寓焉嗣是而

御書樓講堂庖湍復次第告成所費不貲民不知興
作之累而余之心力亦已殫矣學者競相激勵
不獨登賢書捷南宮者若而人卽窮簷蔀屋亦
漸覺觀摩興起而余調撫中州之

命下矣諸生不忘所自乞記其事勒諸貞珉余謂之
曰爲人臣者奉揚

聖天子嘉惠元元德意其爲庶爲富爲教道固多端
茲特其初緒耳其何足記諸生曰夫子之爲此
將傳之無窮也若作梓材旣勤樸斲又必從而

丹腹之繼自今墾辟之土被野烟火之氣滿郊
誦讀之聲遍城郭時屢豐矣民安堵矣後有來
旬來宣者鑒於茲而踵事焉日漸月摩士因文
藝而敦器識民亦感慕而知廉耻教化大行風
俗醇美豈不重有賴乎余曰唯唯否否古之教
學者文辭云乎哉必也六德六行六藝咸備於
躬乃論秀以升功烈聲名於是焉出余行矣多
士勗哉有能繼朱張兩夫子之遺緒講明性天
之學蹤軌前型扶掖來哲仰荅

聖主作人之化余實有厚望焉是爲記

重修嶽麓山萬壽禪寺記

薛柱斗

佛之爲教在緇衣輩力爭其有在闕異者力辯其無彼旣黨其同此復伐其異理固然也情亦然也其爭有者不過因身奉其教而想像言之實不知其佛爲如何有也其辯無者亦不過心旣業儒卽以佛爲異端究竟亦不知其佛爲如何無也余請得而論之夫佛西域之教主也西域之有教主亦猶中國之有聖人也西域之有釋迦彌勒彌陀燈明藥師等教主亦猶中國之有伏羲神農黃帝堯

舜禹湯文武周公孔子等聖人也西域之有釋迦
爲當今教主亦猶中國之以孔子爲當今聖人也
是中國有中國之聖人西域有西域之教主各尊
其教各闡其化其何參差之與有其何辯論之與
有耶惟是金身入夢而漢帝開其端同泰捨身而
梁皇衍其緒此佛教之行於中國有自來矣然以
西域之教而流入中國而中國之儒有力辯之而
不能去者亦有身入其教而奉行不怠者此其故
何歟良以子輿氏有云鷄鳴而起孳孳爲善者舜

之徒也鷄鳴而起孳孳爲利者蹠之徒也是吾儒之教天下者不過欲人爲善耳而佛氏之戒殺戒淫諸事亦不過欲天下之人爲善也此欲善之一念旣爾相同則上與天心合下與人心合此闢異者所以日闢而不能闢甚至躬奉其教而不怠也余請得而論之卽中國之聖人立教亦各不同如伏羲則有爻畫示教神農則耒耜示教黃帝則以冠裳示教堯之欽明舜之濬哲禹之善言則拜湯之立賢無方文王之緝熙敬止武王之不泄不忘

周公之仰思待旦以至孔子仁孟子義何嘗同乎
然而所同者心也佛之教雖不同然而不同者亦
欲世人共爲善之心也心旣同矣則佛教之流行
可以化世情之囂競可以輔吾道之不逮以此相
助爲理何必力闢其異又何必身奉其教哉且攷
之陳睂公先生嘗云天下寺觀乃一大養濟院也
謂收天下之鰥寡孤獨而養之盛世可以釀天和
衰世亦可以消亂萌旨哉睂公之言可謂得治天
下之要矣余分藩南楚署列星沙每於政暇登嶽

麓之巔覽瀟湘之勝訪彌嵩和尚於麓雲蘭若煮茗譚心敲詩論道詢其峯爲南嶽七十二峯之一其寺開自晉代盛於隋唐明神宗賜額萬壽取祝聖義也 國朝定鼎禪師肺山擘草重興開堂祝國吾鄉提督張公諱勇糾湖南雲貴諸當事捐資鼎建前殿大殿兩廡法堂方丈藏閣固一時之盛蓋以連年兵火仍屬傾頽有驛鹹使者趙公雲岑念名山古刹不忍廢墜慨然捐資重修後殿不兩月而工成余推趙公與人爲善之念不覺殷殷有

觸乃捐金鼎建前殿塑彌勒尊者之法身而標閭
程公仕吾亦捐資裝塑帝馱尊天之金像工將竣
趙公再續前善之因以爲合尖之果復爲捐資建
大三門一座是萬壽寺之規模宏遠煥然一新而
全工告畢矣趙公與余仍捐資買置李雲仲本山
下屯田九石以爲香火之資歲集往來雲水於中
安禪受戒暮鼓晨鐘祝國佑民從此名山古寺
相傳不朽而星沙士女登遊其地者時加瞻仰興
起善心其與鷄鳴孳孳爲善之心不亦擴充而光

大之乎余非尊崇其教也取其爲名山重且能勸
人爲善爾果報云乎哉禍福云乎哉

建復禹碑亭記

國朝黃性震

治水碑在嶽麓峰頂蝌蚪奇蹟傳於岫嶺海內
學士大夫莫不奉爲神物前代司土者曾構亭
庇之蓋以保護爲崇重也

今上御極之二十有五年余忝承

簡命備員楚南兢兢職守弗暇登陟今年三月乃
得縱觀嶽麓之勝尋覽碑文則七十七字一片
磨岩露立于蒙茸瓦礫間自明監司石君重修
後累經兵燹榛莽弗芟燼于野燒已數十餘年

矣嗚乎觀河洛而思禹功千古有同心也余安敢對古聖之奎章坐視其浸淫于風雨乎於是庀材鳩工給值傭作纖毫不以煩民經旬乃訖是時

大中丞丁公修舉嶽麓書院四方生徒盛集我皇上親灑宸翰懸額頒書

天使遙臨震耀山谷而茲亭相繼落成休哉昔之禹碑今之

御書山靈景運之升與聖道中天之慶何其後先

協應也哉夫平水土者大禹當年治水之功也
而立民極者

皇上萬世教人之澤也後之學者讀禹篆而思奠
麗之德仰

御書而深淑性之思則治統道統與日星河嶽並
垂天壤是則余之所厚望也夫

重修嶽麓書院記

國朝毛際可

衡山之峰七十二攷古誌以回雁峰爲首綿亘數
百里至星沙之西南隅而始爲山之麓此嶽麓所
由名也趙宋開寶間刺史朱公洞創建書院至乾
道三年考亭夫子訪南軒於其地相與攷道問業
一時士子雲集景從正學丕振人謂瀟湘間彬彬
有洙泗之風焉其後興廢相仍多厯年所暨康熙
甲寅值吳逆之變叛寇稱戈文教歇絕書院將鞠
爲茂草幸 王師蕩平 大中丞丁公開府湖南

首披圖籍慨然曰郡國有先賢之遺蹟而不爲修復是在位之責也遂捐俸爲倡片甕尺椽不以需之閭里庀材鳩工浹歲告竣自 文廟尊經閣而下與夫崇道之祠四箴之亭以及六君子堂後先相望 中丞公又妙簡名流以董帥之每公餘之暇課其會業用相鼓舞父老扶杖感嘆以爲覩記以來所未有也今年夏偶大過三湘而孝廉郭君金門踵門來請曰願有述竊謂地靈與人事常相用者也昔昌黎謂南方之山巍然高而大者以數

請廣書院名額疏

大中丞陸

耀朗甫

奏爲請將書院積存息銀撥充膏火以廣
聖恩事竊照

國家久道化成人文蔚起我

皇上創制辟雍巍隆三代四方之士莫不爭自濯
磨以副作人雅化湖南省尙有嶽麓城南兩
書院每屆年終例由巡撫考試甄別臣仰承
恩命於民風士習留心整頓期崇實政不敢少事
沽名茲於十二月初旬照例甄別報名赴試
者至八百餘人其中文理通明可以造就者

甚多而兩書院額設膏火計僅止數十名不能多爲取錄因飭司道公同籌議去後茲據布政使秦承恩鹽法長寶道李世望詳稱嶽麓城南兩書院於雍正十二年

恩賞帑銀壹千兩又

奏動藩庫銀三千兩發商營運支給嗣因息銀逐有積餘先於乾隆七年將原借藩庫銀三千兩歸還原款復於十五二十等年兩次酌撥支存息銀四千七百兩一併營運以作膏火之用乾隆二十四年欽奉

百獨衡爲宗中州清淑之氣醜醜扶輿磅礴而鬱
積而書院又適當其麓則又氣之所萃毓靈而鍾
秀者也然上下千百年大盛於考亭而又將復盛
於今豈偶然之數歟聞中丞公之撫楚整躬率
屬儆貪黷賑窮乏闢荒蕪釐行戶之艱蠲夫船之
役豪右畏威甘澍應禱善政不能枚舉而學校爲
王化所基低徊於絃誦揖讓之間更爲觀風者所
不能畧也況我

皇上始終典學比年來親灑宸翰以萬世師表之

額風厲學官并求先聖先賢之裔榮以世秩而
中丞公當下車之初早惓惓以建學育才爲務若
有不期而合者焉蓋

聖朝之有名世運會所庋一德交孚固不徒地靈
人事之相因已也殆亦天意將開文治之盛化行
俗美而以此隆於唐虞三代也哉遂拜手爲之記

上諭查辦絲營惠濟生息案內經前撫臣馮鈞會同
督臣碩色

奏准此項銀兩照舊存留仍以具

奏之數爲額嗣後不得再行交商等因在案今自
乾隆二十四年至二十九年止除積銀以息作
本銀八千七百兩及遞年支給膏火外又積存
餘息銀三千餘兩存貯道庫從前

奏明不得續行交商係就當日情形而論今文風
日盛從學之士格於定額似應酌量變通再將
餘息發商以期籌脩益充教育益廣等情臣思

例禁生息原恐官爲勒領商受賠累甚或官商藉以結納易啓弊端是以酌行停止今湖南書院生息一項例由長沙府招商發給每兩行息一分五厘實有贏餘并無賠累且係按季彙繳道庫層上考核原無官商結納侵蝕私肥情弊當此文教昌明從學日衆似可酌循舊章再於餘存息銀內撥三千兩交商一併營運收息以廣兩書院肄業生童額數俾單寒力學之士得以預沐餘膏以資課誦於推廣

聖朝棫樸菁莪之化不無裨益至自此次酌增肄業

自卑亭記

嶽麓書院在麓趾之陽自長沙往者濟江登岸道
出山陟田野間峯巒可數林壑漸開爲程三里有
奇雖皆坦平無險阻然求一憩足之所則不可得
也康熙二十四年丁大中丞思所以廣教化育人
材者捐俸重新書院以聚學徒延山長以主訓迪
置餼田以資膏火又疏請

御

書匾額祿閣經史以旌

先賢脩講誦而庀材鳩

工則委其事于蒞旣已相度經營自

聖殿以及

祠亭門廡坊表垣牆與夫泉池階徑之屬悉補葺而建置之又稍拓其右建

御書樓前增 文昌祠左則造于山舊有二亭稍上曰道中庸更上曰極高明皆 考亭夫子所創而名者今俱無存亦仍其基重建焉工將訖規模咸就纖細畢舉區舍亭池之間足以藏修游息唯自書院達江數里之間往來無所憩息彼負笈至此者欲少從容覽勝概而無一廈以避風日豈非缺畧乎于是度于道中創建一亭俾與高明中庸遙

名額之後如復獲有積存息銀應聽隨時酌量情形具

奏請

旨辦理所有請將餘息籌備以廣教育原由是否可行伏祈

皇上睿鑒訓示臣謹

奏

乾隆四十九年十二月十六日

相聯屬而名之曰自卑蓋嘗聞之師矣強急之趨
半多顛蹶驟躡之行無裨率循彼夫聖賢之道功
極位育而修之祗在戒思慎獨之中體之不外夫
婦倫常之際不益信行遠之自邇登高之自卑也
哉於戲遊斯亭也仰高山之匪遙景前修以遵邁
其於學也亦思過半矣夫慮其所缺以獎翼來學
正董修者事也故旣建斯亭并爲之識使學者有
省焉康熙二十七年三月上巳長沙郡丞山陰趙

孟記

遊記

重九遊嶽麓記

國朝胡作梅

自巴陵濟湖溯湘江而上距長沙南數百里爲衡山山勢綿亘甚士大夫舟過洞庭蓋未嘗不作望嶽想然層雲隱蔽不可於數百里外見也其在長沙郡有山環江西岸爲嶽麓嶽麓者嶽之麓也山足蓋曰麓余固倦於遊不早與夫二三子登回雁之峯尋望日之勝遠摹九嶷窮睇八荒則嶽角面目胸腹腰膝爭奇鬪險闢地開天之觀今固願以

異日顧幸而蚤過茲嶽麓者至止以來日未嘗不
褰裳欲從之然竟不果也時維九月序屬重陽或
曰是孟嘉龍山落帽時也遂濟江而西載酒摘萸
將選高而登之初至江扁舟艤岸側輕利如葉風
徐徐遊江水上尺波不興羅縠如織沙渚尖銳出
江中破江爲兩漁舟停其間炊烟浮沙際不絕布
網迎風有魚戲水面忘歸致翩翩似與漁人狎者
比到岸舍舟從騎便得山山四圍皆草取逕入如
入谷中中有樵蘇人長與茂草齊幾不辨折而西

又折而南又折而東而西又折而西南環視前後
左右皆山也路崎嶇若不可行者前望有淺山迎
馬首遂渡嶺復得一谷從山縫偷覷其東有村落
宛然不知其與江將誰左右也遂聞人聲從院宇
中喧呼若相指使者爲嶽麓書院蓋 大中丞丁
公自涖三湘日以崇儒講學興廢爲已任時方頒
俸選材命工而修之書院右爲先師孔子殿四賢
坐而侍遺像儼然車服禮器雖不具然遊者並低
徊久之如到春風沂水中知儒者氣象不同也殿

後有遺址爲宋朱張兩先生舊祠瓦礫銷頽碑文
半落顧猶依稀傳程氏四箴字樣而已余乃與同
志出祠後攝衣縱步將窮山巔視山頭有亭如戴
方冠知大禹碑在焉初看近若咫尺可趨到然山
背方陡峻負危石巉與吾足力鬪卒不貶久之莫
至也余適困極思息顧同儕皆氣吁吁不勝因相
率中道返嗟乎其進銳者其退速余乃今而悔之
矣取路下如有逼之不復持余踵余益知進之難
而退之易如此乎其不可不戒也於是改策易塗

造山之腰有松吟其前有石臥其側有閣懸其旁
有亭要其路休息俯仰不求而具方是時余且志
氣完綽有餘閒不復如向之跋履艱危也未幾達
山寺寺鑿山爲址竹樹環之有泉冽然流甚細自
竹根中逍遙來寺後尋山峯不復見蓋有蔽之者
將往求之而余遊具且蕭然遂返從山腰看郡城
內外遊市中如小兒衣冠隱隱湘江一帶漁舟大
如瓢不可指數白鷺著沙汀甚微出沒隱見彷彿
如畫院中匠作那許聲近在山下杳不驚山上人

耳第見撿斧運斤人影搖動而已徐而下得平地
山周之如環向之所樂江城漁鷺遠眺之形及其
山下鳩工庀材縱橫上下經營之狀一旦逃避去
色聲香臭味蕩然都空余方惕息四顧覺天機之
動灑灑從心目間抽曳矣谷盡還書院舒李北海
石碑處碑文斷續可思前人心神僅有存者騎而
歸馬輕其險人忘其疲揚鞭送鳥甚自得也豈非
塗取已經性安所習久之而後知履之而後能者
乎遂抵江相攜就舟臨流引酌舟人縱謔聲上下

若相和者久之風驟震揚帆飛渡亂流而東比到岸則殺蛟猶在舟中也始余畏山之勞而遲遲日月也故不幸到于今及余爲其事而不擇其塗縱其力而又不寧其氣故中阻其後也余選途而反之北往還而熟之變人情于登臨挾物隱于山水予心有樂焉惜夫其命志之不堅氣之不善養力之不勤遊具之不充於囊竟不獲及嶽麓之巔以止也况于嶽哉夫循級而登勿敗于速苟不止雖嶽余固將及之惟其志其氣其力之是爭而余何

畏焉既以感于心退而爲之記

附跋

跋胡抑齋嶽麓遊記

大中
丞 丁思孔

嶽麓爲衡山七十二峯之一踞長沙西岸隔湘川而相望也出城渡江不十里爲遊觀所必至郡志載昔人題咏址多而南軒晦菴兩先生於此講道勸學其名益顯自流氛肆毒暨近罹逆亂征伐勘定之餘漆莽丘墟名賢罕至山靈亦有今昔之感矣余視事經年民稍蘇息士子漸知嚮學於是修

葺書院以繼往開來正在此工而抑齋太史閒居
乘舟蠟屐適逢九日挈伴登高旣洽勝情乃放斯
記誠昇平之佳話山靈之幸事也夫記遊者不過
搜奇歷險摹寫其詭異恠偉之觀詩酒友朋之樂
而已今獨於登臨進退間不念理要惓惓以銳速
難易堅定善養之說反諸身心一篇之中三致意
焉而耳目所接天機流動瀕瀕乎境與神會則非
尋常所及也湛甘泉先生語學者當隨處體認天
理抑齋其庶幾乎書院旣成當鐫置壁間以告此

那士子與後之遊茲山者

遊嶽麓書院記

國朝 李何燿

自津頭得一艇橫江西渡經橋洲尾泝流云五里岸行可三百步始及嶽麓書院石坊坊左右皆田或瘠或腴秋淺尚未穫也從石坊抵院門道直如弦寺乃在西南間矯首翹視畧已目治四眸低墜勢猶壑瀉老杜所謂殿角插入赤沙湖者此其似歟考書院始於宋唐以前無有故當時但以寺遊言之使少陵而在則南紀波瀾西河風味之句奚俟載筆於衡山矣院制如郡邑學宮登夫子堂持

以顏曾思孟不木主而像乃聖乃神吾若吾相繪
者不辨命之繪者亦不辨也廟後立二十餘級聳
室三楹世宗敬一箴程明道視聽言動四箴在焉
刻劃藉石以不朽人心其能如石乎其西爲朱張
祠少前爲六君子祠世謂經生不能介胄宋以是
弱孔徒三千氣壓戎馬而秉禮之國終不能與齊
晉爭強此豈姬公爲之耶其前則諸士課業之地
有堂有廡如是者二牆以間之計可容二百人生
徒昔有至者然虛席極多則好學之衰於古可知

也周覽已畢坐擬蘭亭取汲泉水飲之甘於江水
于時暑氣未減登涉爲勞憩息片晌如奕者一局
時耳與遊者俱出尋李北海嶽麓碑有亭覆之碑
向爲火所焦因摹榻者冬日畏寒以荻環其外不
戒於火而火不甚熾未至斷裂然蝕去者數十字
矣一嶽麓也先聖宮牆於斯諸賢先後集於斯而
禹碑與北海實上下之所以先北海而後禹碑者
比於追邇往代不以苗裔先根本不以夏殷先義
軒也禹碑面東向茅山而饒非人力所能動移中

有斷痕類夜半天河影自夫子廟至此當以二千
步計路峻甚不能卽至則且止亭在其間凡欲觀
禹碑無不買勇疾上所以止此者蓋喘而非倦也
曦馭旣晏天朗氣清白雲一縷淡且欲散憑人而
下扶之不忍去手比少夷衍池水一泓衆草繡碧
則道鄉臺實踞而臨之道鄉臺三字朱紫陽手書
子曰自吾有由而惡言不入於耳此亦夫子之後
勁歟同遊者曰觀止矣於是以肩輿至嶽麓寺寺
遊則別記之以釋與吾儒因應異日談也

乙卯七月
十七日

遊嶽麓記

羅俊

憶己未秋遊恒嶽自渾源州南入可二十里至山足其間有所謂懸空寺者峭壁百丈寺懸其中觀之令人驚心駭目時秋將半白草黃沙塞雁哀鳴邊城景色莽蒼彌望路委折不甚陡峻騎行可至山腰過此則拾級而登土人指十景相告因與同遊諸子分韻賦詩及至頂謁嶽帝日正中天秋陽暴烈俯視山下則已黑雲密布大雨忽作雷聲殷殷反在足下噫嘻豈不一大觀也哉夫恒嶽遠在

邊塞之外去家五千餘里不憚跋涉而遊衡嶽楚
之望距家鄉非甚遼遠乃生三十年而不能一至
豈洞庭之險反勝於太行雁門耶丁卯春買舟而
南行三十里卽阻石尤八日始抵嶽陽因歎舟楫
不如車馬可計程而至也泊舟湖畔忽遇順風一
日夜卽抵星沙驚風巨浪瞬息百里數日鬱困一
旦舒放固不必登嶽而始爽然也南嶽在衡山縣
去星沙尙三百餘里卒然不能至而嶽麓近在湘
西卽南嶽七十二峰之一蓋衡山綿亘八百里四

雁爲首嶽麓爲足云同學王子孟穀先至山中作
詩招我乃爲雨阻不卽遊暮春一日棹扁舟繞橘
洲而西洲橫江心每春夏水漲不能沒與波上下
蓋昔人所謂地肺焉抵岸芳草迎風鮮花映日隔
江所望嶽麓寺者反杳然不可見循山徑迤邐而
行四無人聲惟聞百鳥和鳴令人作桃源想數折
至道林寺寺門窈窕唐人遊覽賦詩必與嶽麓並
稱觀其弘敞幽邃自是一清淨佛地也又行里許
至書院規模壯濶丹雘炳煥書聲朗朗徹院外嗟

嗟逆氛扇虐而後湖湘人士殘敝已極今乃登衽
席而誦詩書又安可不思春風化雨之所自來耶
隔書院爲學宮內塑先聖暨四賢像恭敬展拜而
出李邕碑剥落漉漫剔苔蘚可讀望道鄉臺不能
不生遷謫之感而美清風高節之可傳且歎山僧
之賢於溫益萬萬也從此登山羊腸透蛇扶童子
喘息甚昔人濟勝之具真不可少路傍有舍利塔
相傳昔名僧以舍利一撮付隋文帝後分五十三
處建塔藏之嶽麓其一也然陰晦無寶光心竊疑

焉或謂爲人盜去諒亦不謬入寺憩虎岑堂山僧
煮茗清談燒笋侑脫粟飽食一過清芬可人泉聲
自窓外至如歌如訴如琴韻如簫聲悅耳怡心眞
覺紅塵之擾攘可憎也日旣午同王子詣山頂捫
蘿攀藤松花竹粉掩映襟帶間旣至縱目一視諸
峰羅列眞如兒孫遠邇之間延野綠而混天碧柳
子之言洵非欺我禹碑遠在前山路崎嶇恐日暮
不能到亦斯遊之一憾也南望山光隱隱層巒疊
嶂杳無盡處祝融紫蓋諸峰想在煙靄間顧不知

何日始慰觀臨之願亦如恒嶽之登峯造巔耳抵
暮尋舊路歸鷓鴣聲朗然可聽林間白鵲忽隱忽
現時值朔日尙無新月可觀因思三五之夕據岡
長嘯猿聲響應清景又當倍增歸寺宿僧房萬壑
松濤翻然到枕謂王子曰昔遊北嶽時同人五六
輩今八九年間散如晨星或仕或處或且志於富
貴視故人如敝屣者今吾與子數年之後車笠之
情又安可保耶王子謂是安足道請聽梵唄皆如
夢幻富貴乎何有功名乎何有卽茲遊亦何有哉

遊嶽麓寺記

李何煒

嶽麓有寺至唐始大著沈歐之筆杜韓之篇世所寶也近聞寺有掘土者深數尺得瓦百數十片雖不及未央銅雀以爲硯頗能下墨云是王僧虔藏物則晉宋以來有之矣崇禎癸未寺旣燬於兵火竹木斬伐幾盡肺山和尚力募再創高下參差縱橫疎密遠豁慧眼實具匠心彌嵩其上者也叅學有年不愧付託精神淵著情致蕭散師已西歸敬遵遺命厝其蛻於寺後而塔封之予詩中所謂寶

鏡臺前種明珠者是也山氣如渴驥奔泉至此忽
自住其銜勒形家遇此甚難而肺山安坐而得之
釋云無生何有於骨蓋衣鉢相傳自有世系未有
爲人子孫而忍暴露其祖父者則佛氏之教亦何
嘗大遠於人情哉彌嵩業浮屠而能爲儒者言與
予輩登高而眺倦遊而坐直至月出重以茗飲予
與王子在簡不能斷酒因攜與俱彌嵩亦無忤也
語次偶徵夢事各述舊聞忽有蝶集於席上兩翅
文成五彩與皓魄相爲映照良久始栩栩去背支

公善解莊子豈其神化爲之乎月過中天僕侍皆
腫露濃草濕未寒已涼因與鄒與傳章戴謀共出
寺門東望郡城萬籟無聲獨江間漁火時隱時現
風靜波恬雲無纖芥厯厯可指數也昂首西顧真
武殿出於顛際竹樹環擁而蔭之真武有帝者之
號故其位置不妨高於佛恨無徐佐卿鶴化術耳
然子猷之興已盡黑甜一枕晨鐘喚起與同遊者
飲而後詣之道人方起案有桃實數枚道人謂此
徑榛莽殊未易翦除獨予以一緇一黃彼此往復

何爲幽尋及此蓋爲望南嶽而來也與道人談華
山參嶺之勝不覺精魂飛動道人以病不能久語
別去下殿行可百步少折而西爲飛來石七十二
峰恍在白雲紫烝中得韓幹韋鷗操筆當以匹練
概括之矣彌嵩曰此行歲月可書山中高寒澹澈
嶽麓如此則拜祝融而登峰造極者當復何似又
安可不使世間塵滓人知之於是以屬不律使有
記焉乙卯七月十八日